



UKA2015/107
4. november.15
Mimi Karlsen

Soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfissinneqarnissaannut Naalakkersuisut upernaakkut 2016-imi ataatsimiinnisamat inatsisissamik saqqummiinissaannik Inatsisartut aalajangiiffigisassaattut siunnersuut.

(Inatsisartuni ilaasortaq Ane Hansen, Inuit Ataqatigiit)

Inuit Ataqatigiit Ane Hansen qutsavigiumavaat utoqqaat ukiorpassuarni illuminnut akilersuereerlutik, soraarnerussutisiaqalereernerminni illuminnik aserfallatsaaliinissamat akissaarussimasut pillugit tapersersornartumik siunnersuuteqarmat.

Politikkikkut ersarissumik anguniagaqarpugut, tassalu utoqqaat pisinnaasut sapinngisamik sivisunerpaamik angerlarsimaffimminni najugaqarnissaat pingaartikkatsigu. Pingaartipparput utoqqaat sivisunerpaamik angerlarsimaffimminniissasut. Taamaammallu utoqqaat angerlarsimaffimminniittut illup iluani ikiorteqartippagut, pisariaqarpat aqqutaat nivatsittarlugu aammalu pisariaqartitsippata igaanik pajuttarsinnaallugit. Tamakku iluaqutigalugit utoqqaat angerlarsimaffimminniiginnarsinnaanerata qulakkeerniartarparput.

Angerlarsimaffilli illuutaaguni aserfallatsaalineqartariaqarpoq, tamannalu utoqqalinersiaan-narnik akilerlugu suliaritinneqarsinnaasanngilaq. Taamaammata Ane Hansenip siunnersuutaa utoqqaat illuminniittut 100.000 kr atorlugit iluarsaassinissaannut periarfissiiniarnera tapersernarpoq.

Nalunngisatsituut maannamat BS aqutigalugu illuutillit periarfissaqarput illuminnik iluarsaassininnaallutik imaluunniit allilerisinnaallutik. Allaniillu aamma utoqqaqarpoq namminneq illuliaminnik illuutilinnik. Taakkuttaaq sivisunerpaamik illuminniinnissaannik periarfissittariaqarpagut.

Nammineq illuuteqarnermi tapiissutit allat pissarsiassaaneq ajorput, soorlu boligsikring iluarsartuussisinnaanerluunniit. Bankimi atorniarneq ajornakusoorsarpoq, isertitammi utoqqalinersiutaaginnartarmata bankit atortitsinissaminnut periarfissiisanngimmata.

Taamaammata Inuit Ataqatigiit tapersersornartippaat utoqqartatta sivisunerpaamik angerlarsimaffimminniiginnarnissaat angujumallugu illuminnik iluarsaassinissaminnut 100.000 kr. taperneqarsinnaanngornissaat.

Najugaqarfiusuni assigiingitsuni illunik iluarsaaneq sanasunik suliffissaqartitsinissaa aamma iluaqutaassangattipparput.

Taamaalliluta siunnersuut ataatsimiitsitalianut susassaqartumut ingerlanneqarnissaa innersuullugu taperserparput.